

欽定四庫全書

子部

薛氏醫案卷九



南京中医药大学图书馆版权所有

詳校官太醫院吏目臣朱桂

編修臣倉聖脈覆勘

欽定四庫全書

薛氏醫案卷九

眼科

原機

論目為五臟之宗

經曰諸脈者皆屬目目為五臟之宗

肝氣上注於目而為睛

明 薛己 撰

為目之精為白眼肌肉之精則

相精之窠為眼骨之精

血而能視鍼經曰五臟

為約束裏擷筋骨血氣之精而與脉并為系上屬於腦
後出於項中故邪中於項因逢其身之虛其入深則隨
眼系入於腦則腦轉腦轉則引目系急目系急則目眩
以轉矣邪中其精其精所中不相比也則精散精散則
視岐故見兩物目者五臟六腑之精榮衛寃寃之所常
營也神氣之所主也故神勞則寃寃散志意亂是故瞳
子黑眼發於陰白眼赤脉發於陽故陰陽合傳而為精
明也目者心之使也心者神之舍也故神精亂而不轉

卒然見非常之處精神鬼鬼散不相得故曰惑也東垣
曰夫十二經脉三百六十五絡其血氣皆上走於面而
走空竅其清陽氣上散於目而為精其氣走於耳而為
聽因心煩事冗飲食失節勞役過度致脾胃虛弱心火
太盛則百脉沸騰血脉逆行邪害空竅失明則日月不
明矣夫五臟六腑之精氣皆稟受於脾上貫於目脾者
諸陰之首也目者血脉之宗也故脾虛則五臟之精氣
皆失所司不能歸明於目矣心者君火也主人之神宜

靜而安相火化行其令相火者包絡也主百病皆榮於目既勞後運動勢乃妄行又因邪氣所并而損血脉故諸病生焉凡醫者不理脾胃及養血安神治標不治本是不明正理也

按此論目為臟腑血脉精氣之宗至為詳悉豈但世俗拘之於五輪八廓而已也

論目昏赤腫翳膜皆屬於熱

原病式曰目昧不明目赤腫痛翳膜皆瘍皆為熱也及

目膜俗謂之眼黑亦為熱也或平白目無所見者熱氣
鬱之甚也或言目昧為肝腎虛冷者誤也是以妄謂肝
生於目腎主瞳子故妄言目昧為虛而冷也然腎水冬
陰也虛則當熱肝木春陽也虛則當冷腎陰肝陽豈能
同虛而為冷者歟或通言肝腎之中陰實陽虛而無由
目昧也俗妄謂肝腎之氣衰少而不能至於目也不知
經言熱甚目瞑眼黑也豈由寒爾耶而仲景言傷寒病
熱極則不識人乃目盲也正理論曰由熱甚怫鬱於目

而致之然也若目無所見耳無所聞悉由熱氣怫鬱玄府閉密而致氣液血脉滯衛精神不能升降出入故也各隨鬱結微甚而有病之輕重也故知熱鬱于目無所見也故目微昏者至近則轉難辯物由目之玄府閉小也隔縑視物之象也或視如蠅翼者玄府有所閉合者也或目昏而見黑花者由熱氣甚而發之於目亢則害承乃制而反出其泣氣液昧之以其至近故雖微而亦見如黑花也及衝風泣而目暗者由熱甚而水化制之

也故經言厥則目無所見夫人厥則陽氣并于上陰氣并于下陽并于上則火獨光也陰氣并于下則足陰足陰則脹也天一水不能勝五火故目眚而盲是以衝風泣下而不止夫風之中於目也陽氣內守於睛是火氣燔目故見風泣下

按此論熱甚怫鬱陰陽并厥玄府閉密致目病之由為詳蓋一主於火熱之化也若由飲食辛熱七情所動六氣淫鬱氣血虛實則東垣子和陳無擇輩論亦

已詳然亦有痰熱濕熱與夫服食金石燥熱之藥致者或久病後榮衛虛弱肝氣腎陰不足或元氣精氣虛衰及脫營為病皆有虛熱實熱之殊並宜分治

論眼證分表裏治

機要曰在腑則為表當除風散熱在臟則為裏宜養血安神暴發者為表而易治久病者在裏而難愈

論目疾宜出血最急

子和曰聖人雖言目得血而能視然血亦有太過不及

也太過則目壅塞而發痛不及則目耗竭而失明故年少之人多太過年老之人多不及但年少之人則無不及年老之人其間猶有太過者不可不察也夫目之內眥太陽經之所起血多氣少目之銳眥少陽經也血少氣多目之上網太陽經也亦血多氣少目之下網陽明經也血氣俱多然陽明經起於目兩旁交頰之中與太陽少陽俱會于目惟足厥陰經連于目系而已故血太過者太陽陽明之實也血不及者厥陰之虛也故出血

者宜太陽陽明蓋此二經血多故也少陽一經不宜出血血少故也刺太陽陽明出血則目愈明刺少陽出血則目愈昏要知無使太過不及以養血目而已凡血之為物太多則濫太少則枯人熱則血行疾而多寒則血行遲而少此常理也目者肝之外候也肝主目在五行屬木雖木之為物太茂則蔽密太衰則枯瘁矣夫目之五輪乃五臟六腑之精華宗脉之所聚其白人屬肺金肉輪屬脾土赤脉屬心火黑水神光屬腎水兼屬肝木

此世俗皆知之矣及有目疾則不知病之理豈知目不
因火則不病何以言之白輪變赤火乘肺也肉輪赤腫
火乘脾也黑水神光被翳火乘肝與腎也赤脉貫目火
自甚也能治火者一句可了故內經曰熱勝則腫凡目
暴赤腫起羞明癰澁淚出不止暴寒目瞶皆太熱之所
為也治火之法在藥則鹹寒吐之下之在鍼則神廷上
星顙會前頂百會血之翳者可使立退痛者可使立已
昧者可使立明腫者可使立消惟小兒不可刺顙會為

肉分淺薄恐傷其骨然小兒水在上火在下故目明老人火在上水不足故目昏內經曰血實者宜決之又經曰虛者補之實者瀉之如雀目不能夜視及內障暴怒大憂之所致也皆肝主目血少禁出血止宜補肝養腎至於暴赤腫痛皆宜以銇鍼刺前五穴出血而已次調鹽油以塗髮根甚者雖至于再至于三可也量其病勢以平為期

按此謂目疾出血最急於初起熱痛暴發或久病鬱

甚非三稜鍼宣泄不可然年高之人及久病虛損并
氣鬱者宜從毫鍼補瀉之則可故知子和亦大畧言
爾於少陽一經不宜出血無使太過不及以養血目
而已斯意可見

論內障外障

龍木論曰眼疾有七十二般內障二十三候外障四十
九候病狀一一不同據其疾狀認識既不差錯治療少
有所憑

謹按諸候詳見本論然內障為黑水神光昏翳外障則有翳膜者是今論中雖具諸候而所用藥多本風熱故並畧云然內障有因於痰熱氣鬱血熱陽陷陰虛脫營所致種種病因皆畧之不議況外障之翳有起於內眥外眥睛上睛下睛中當視其翳色從何絡而來如東垣治例魏邦彥夫人目翳從下而上病自陽明來也綠非五色之正殆肺腎合而為病也乃就畫家以墨調膩粉合成色諦視之與翳色同矣肺腎

為病者無疑乃瀉肺腎之邪而以入陽明之藥為之
使既效而他日復病作者三其所從來之經與翳色
各異因詢此必經絡不調目病未已問之果然如所
論治之疾遂不作若此憑其色究其所兼所本之因
處治而不愈者蓋邪蘊日久而實元氣陰氣不足所
致也當以王道論治庶可但世俗不能守此理遂致
失明者多矣悲夫

論瞳子散大